

65167

景寧縣續志

景甯縣續志卷十六

景甯縣縣長浦江吳呂熙纂修

藝文志 上

觀乎人文化成天下潤色鴻業易之則野翳我先正蓋多作者紛綸前籍彬彬大雅六十年來踵起儒魁巖穴奇俊屬辭雲雷美哉詩章富春釣臺在陰酬倡金石爲開名山什襲或委塵埃壽之竹素寶此瓊瑰志藝文

論說

本邑何利當興何弊當革論

王錫藩

邑人問屏

法久則弊生弊積則法立此固無間遠邇也而急難稍延者則本邑爲甚賢司牧經理措置百餘年來或已振興而未竟端緒或既改革而尙有根株是不可不力爲整飭之造士久崇實學邑書院藏書久缺問學綦難善乎南皮張太史之洞韜軒語學條諄切以購書爲勸書院租息果變通籌款置備經史子集並經濟門有用各書俾士子交相研究成就當必有可觀賓興向止請回惠明寺舊撥蓮城書院租之半計

景寧縣續志

卷六藝文

上

論說

二

五十石壬申修志邑人士雖請將雅峯豸山二書院膏火租改撥共百石但田多磽瘠鮮收有名無實大比年武生分成後文生川費仍屬拮据計邑距省較遠赴闈者每不滿十人或于前賓興外續再籌添庶觀光者自羣相躍校士舊無試館前因改建學宮其文昌閣址一時未能得地權遷於書院講堂後規制本不相宜而基址逼塞朝對雅峯又少塔尖聳秀形家每謂不利科名以故士赴棘闈屢薦不售籌辦廣額亦格不行誠合而與試館舉而新之未始非培植人才之道祀典社稷神祇二壇久待修復雩祭亦關

緊要志載名宦若明大司馬孫公原貞知縣程公達
教諭龔君麒鄉賢則明都司經歷潘琮數百年來豈
無相繼代興允宜續請崇祀此外如忠孝祠之亟待
興修崇義祠之宜爲致祭省垣雖有采訪節孝總局
本邑碍無彙辦相應循照局章以正科鄉試年分飭
卽彙報省垣則發潛德之幽光者正不少舊志明時
永樂跨龍二隄化沙磔爲膏壤者十餘頃誠舉而恢
復之不惟南北田廬並資利賴且川間确石悉成隄
岸引水就渠梭舟之停泊外卸埠者均克挽駛至城
於市集較徵旺盛但費繁工鉅經始者不無有所累

難耳川口直接大溪船筏往來每遭灘險甚則屢爲
覆溺之凶若外卸下游之天師石尤爲著名險惡惟
就商捐集欸以次修濬亦所謂利涉大川往有功也
官桑園在外卸並城內錢山等處凡有其四皆明邑
令姜公師閔置後漸廢棄其基址亦改建無存前郡
守高要馮公譽驄曾飭屬勸種果能遍蒔桑苗舉辦
如法雖未必與浙西競美而閑閑十畝蠶織之利將
自此興足衣者仍不緩於足食邑無商運米石殷戶
最易居奇則社倉較爲至計同治間曾兩次捐辦經
理者懼典守之遺累也六鄉均就于城中之衆善局

建厥但此係民捐民辦繳於城而不能給於鄉則適以滋碩鼠而已現復捐穀六千餘石倣照江西省章程除本邑最小治現辦已得穀五千石足額前捐者不計尙餘穀一千餘石原足供建倉各經費開銷然其要綜在擇董得人繳儲後卽有折耗禁取重息仍酌以年限準其另擇交替斯承任者不致滯累而樂以奉公圖匱於豐誠宜加意粵亂肅清後浙省舉辦善局封邱邢公守道權邑事集資勦建中分四所曰保嬰也惜字也施棺與收埋也顧局欸生息者有年而其事仍遲之又久擬合釐訂章程由局開辦並由

保嬰推廣諸鄉各設分社其一切經制倣照省垣之同善堂竭澤焚林皆爲刊碑示禁於大溪勦設放生潭醫局則視經費之有餘爲之其斯爲仁民愛物者乎且夫利必主乎因則不費弊惟去其甚則不苛有名爲利而卽弊亦有後爲弊而始原利者環縣六鄉計圖二十有六分土狹而分都廣綜理頗覺維艱士瘠民貧賦稱下下雍正間宮保總制李公衛行順莊法殫心釐剔額定正耗糧銀俾相遵守嗣因邑鮮紋銀以錢輸納弊害漸滋復經碑定以洋蚨二員折淨紋銀一兩二錢除去額定每正銀一兩加耗一錢外

餘銀一錢卽爲頃解之資則以銀折銀更無所爲津貼也前巡道周公開錫復減定本邑每兩制錢五十文以恤民艱乃未幾省垣銀貴後加以洋水每兩計加洋銀一角九分三釐所冀仍復舊章則足民而仍足額樂利實以無窮鱗册自康熙初年已燬原額租糧已難磨對民間置買立券有賣有湊有重湊有截有借有叠借無已往往或百數十年而尙有未清割鄉鄙更有田皮田骨諸陋習旣多鞆鞆永啟爭端何如頒之契式查照定額絕者隨卽推糧土名載明戶册并同稅契同尾粘連其典業仍不得多載年限則

契杜其弊而業得以安至田之外爲山初種者率皆外籍柵民迨開剝日多土著亦尤而效之詎知自開掘後土性疎鬆一經霖潦遂成川決其爲田廬之患不減於蛟且濯濯成形卽鳥獸亦出而爲害實所得少而所失多也是則未種者不可復開已種者許栽茶竹禁合顧可或弛歟遠鄉接壤甌閩並青田邊鄙豪強動以重債盤剝邑產是不可不力爲防閑其尤者則聚開爐冶淘洗沙坑強硬之徒羣相依附非嚴爲禁遏不爲功至近省流氓勢如紛織固非晉豫之奇災也而紛至沓來者年凡數十輩暴戾恣睢肆焉

無忌附近乞人又從而比暱之惟嚴行保甲守望相助卽以此而戢奸萌歲偶祲殷富者出糶慮其難以爲繼不數日而卽杜門往歲創爲米局設止一處祇及於城而不行於鄉且人限之以斗遠來者數口之家日相往返未免徒負農忙而斗價不滿一洋蚨市中又無兌換適成爲畫餅而已無濟於貧仍無益於富竊謂與其踵乎前事徒爲司局者之利終不若飭令平糶不敷則再行運濟較簡便而可行蓋邑米祇防出境而歲非奇荒則所糶所糶均此人卽均此米耳錢法本貴流通近自甌海申禁私錢後奸民競販

出外境市肆間充斥有四六者有三七者薄板沙壳大爲閭閻之害設偶禁而卽弛則不肖商民禁時所收之制錢正以作弛禁時販私之計邑境壤接犬牙防閑已密而與甌郡一水通流則奸商偷運船戶攬載誠宜備爲稽查若夫合邑公產原設董事專司乃或取巧夤緣遂致弊端百出收則爲欠存則爲墊堅固者漫爲收折修理者徒事補苴卽如書院年款年修卒以一報銷了局雖數百石租息無補漏卮其他寺廟祠宇租額旣無勒石董理者亦鮮將簿據盤查一舉而澄汰之庶其有能自愛者搢紳爲齊民之望

嚴密關防斯無奔競卽訟獄或可潛稀而習俗所沿稱名乖異醮婦有所謂售父售子者久經前邑令汪公士璜立碑禁革志所云疾病先巫覡而後醫藥送終崇緇黃而務火化是宜黜夫淫祀准以禮經不相惑於風水之說塋祭各循其分舊俗咸以維新昔孟子論滕五十里猶可以爲善國景固蕞爾邑哉而舊尹陳嚴之句云此邦近似唐朝古屬在桑梓固不無聞見之較近也然則必如何而利無不興弊無不革曰制治必先於立法而行法惟在於得人

此卽蕭郡守觀風評爲巖穴奇士文字

三老圖說

教諭

孔憲采

桐鄉
雅六

三老圖非圖也三老共處各有形模宛如圖故名爲圖也其大老差短鮐背頭過步面皺起紋扶杖得得行子弟侍左右如癯鶴毵毵而徐步也如古石頽乎蹲中庭而稜稜起也二老體胖頤豐紫氣盈眉宇鬚髮曠如善飲啖談吐微婉中事理如庭槐擁腫風過處音聲中琴瑟也如蒼松翠柏直立於遙山上氣磅礴可遠望而不可近狎也三老則頎而長高視濶步精爽迥出大二老上矯如雞羣鶴立而翥軒軒也森如修竹凌青霄而影亭亭也此三老之形模也今約

景寧縣續志

卷六藝文

上

圖說

八

計三老年共二百四十歲家景寧之東坑其子弟皆讀書務農誠樸有祖父風余往年奉辦團練過其鄉三老陪余飲樂其年老兄弟扶杖撰屨怡怡靄靄如也又樂其地山高水清風氣醇茂可與敦古處而明禮讓也豔羨久之夫商山四皓行非不高洛陽耆英會非不盛而或隱或顯志趣不必同且非一家兄弟也至若姜肱之共大被田氏之感紫荆兄弟皆友愛而未聞胥臻上壽也今觀之三老不將今人勝古人乎余所以摹其形而圖之景邑袤延三四百里皆重岡疊巘綿亘不斷其土磽瘠而生產少俗儉嗇人樸

素故人皆敦厚多壽考二老以耕讀世其家計歲之
入輸官賦給公費以其餘謀家室不染末俗子弟皆
循分自守余與二老交尤稔其爲人溫厚諳世故無
谿刻語爲學官老諸生諸子皆務本勤學餼於庠將
以次貢成均足以型方訓俗爲一邑表故爲圖說貽
之大老名知管二老名志管三老名契管同產生姓
鮑氏

序跋

居易軒詩集序

訓導 張維翰 歸安 慕九

嚴月舫學博翰老友也氣靄如春節介于石夙爲鴉
峯院長嘗與尊酒論文娓娓不倦光緒庚寅潘嶧桐
學使按臨枯郡稱其耆年篤學僉謂名實相副今春
携平生詩藁四冊屬翰刪訂備承謙抑竊謂攸關倫
紀之詩足扶風教不當刪曠懷古迹之詩足當史論
吟風弄月之詩足徵天趣不可刪君之詩其高者駉
駉登古作者之堂餘亦迥異流俗至其志和音雅温
厚端莊之氣粹然一見於詩讀其詩可知其人刪云
景甯縣續志 卷十六藝文 上 序跋 十

乎哉嗟乎使月舫得志於時上與名公巨卿相和則
和聲以鳴國家之盛也必矣卽不然使月舫生當乾
嘉盛時得隨園老人輩一字一言之獎亦足以傳于
不朽乃窮老萬山中僅僅以吟咏自娛而知音者又
復尠焉嗚呼此其不幸也夫此其不幸也夫

鴉峯書院錄序

嚴用光

從來有治法尤貴有治人治法未立不足以集事治人未得亦難與圖功兼二者則事舉而功成凡事類然而書院賓興特其一端耳景邑書院之建由來已久初名鶴溪講堂繼曰指南書院嗣以講堂朝向鴉峯改爲鴉峯書院迄今因之院中徵租無多不足以繼膏火同治乙丑皖江陳子木大令來宰斯土撥金仙寺田租充入書院而膏火賓興稍裕但規條未立變更復多整頓未能振興無自識者慮焉光自光緒己卯承杭府龔幼安同年本府潘芸臺太守薦主書

景甯縣續志

卷十六藝文

上

序跋

十一

院講席於今十有五年竊謂吾邑士遇多艱文風不振由於有書院之名無書院之實章程未善經紀失宜常思采議規條加增膏火俾向學之士肄業其中今龍泉蔡則軒明經寄金鰲書院錄見眎詳爲披閱先得我心爰與書院賓興經董商酌將新舊田產按籍清釐通籌出入議定規條錄旣成請邑尊侯蓉江大令裁奪稟明立案付之手民以垂久遠今而後書院之膏火備寒儒之艱於境者得以盡力於學賓興之資斧給志士之澁於費者得以專心爲文庶幾名實相副經理得人士習文風蒸蒸日上可拭目觀矣

夫吾景爲枯蒼下邑芝田分域溪山清淑鍾毓有靈
宋明來人才輩出代有其人近則今不古若雖由運
會使然抑亦培植未至耳聖朝文治昌明超越前代
願諸生爭自濯磨鼓舞奮興仰答作人之雅化藉副
厯任仁侯栽培之美意則書院賓興之設豈徒然哉
襄其事者葉君乙照柳君景星潘君文藻潘生維深
馬生獻圖鮑生則衡則康葉生福年之胄兒子思正
等若夫擴充經費振作人文尙有俟後起之君子

雜記

景甯縣改建儒學記

錢謙益

江蘇
牧齋

景甯縣之有儒學景泰三年置縣時兵部尙書孫公原貞所創也地在縣治之西北因僧寺改創成化六年知縣林埵加葺大成殿東齋泮橋二十一年知縣高政增建西齋後堂地勢偪陋三面皆荒塚文廟講堂偃背不合櫺星門兩掖逼民舍學門東出委巷中正德壬申知縣林傑闢門於震方自隆慶壬申以逮萬歷癸未知縣陳巖之林喬松姜師閔修葺略備然而面勢渙散像設黯淡士氣窳惰而科名寥落若與

景甯縣續志

卷之六 藝文上

雜記

三

宮宅地形之說相叶應焉宣城徐君日隆爲令之期年政清民肅百廢具興建麗譙樹講堂山城下邑煥然改觀祇謁廟下周視嗟咨喟然而歎曰茲地之不足以及宅吾先師久矣與其修治也不如改作乃相地於縣治之西而遷焉捐俸錢搜贖鍰量工命日庶民子來經始於崇禎十四年之二月越二月訖工四月朔迎先師像於郊外用釋奠禮告成廟後枕乙山前朝辛峯左右翼然若趨若拱谿水迴合繇右掖左匯泮池桂山如屏鶴溪如帶觚稜干雲丹雘耀日諸弟子員釋菜而退講讀飲射聚觀太息以謂徐君之卜

遷也勇其作事也敏傭工惟時役不告勞作貌顯嚴
若有鬼神佑助不可以不記也予惟廟學之設所以
教國之子弟使之以瞻以儀有所觀感而興起也景
寧之爲邑分自青田劉文成奮乎青田厲褐爲帝者
師夫獨非國之子弟乎哉文成憤元政紊亂盜賊賄
賂公行至欲感槩自裁及其叅石抹軍事與婺州諸
將士角逐於衝車飛矢之間自誓爲元之遺民沒身
而已矣一旦風雲玄感致命懷節觸迂權奸之死不
悔世之傳文成者以爲出鬼入神乘風雲而御六氣
不知其希聖希賢凜然忠孝人也文成少授春秋經

景寧縣續志

卷七藝文

上

雜記

古

義至今在人口繇文成之忠孝遡其學問之原本則
先聖教人之指意可知已矣故曰吾志在春秋行在
孝經儒者所童而習之者也爲臣則忠爲子則孝用
以謀王斷國則可以成變化而行鬼神繇文成之學
以遡於先聖先師一而已矣景寧之人士游於斯學
有所觀感而興起焉師文成而可矣今天下虜寇交
訖王師在野得文成一二輩庶可以慰天子拊髀之
思其當自文成之鄉人始詩不云乎在泮獻馘徐君
之修廟學也韓子之所謂爲政知所先後可歌也已
是年六月朔日記

虞山一代文宗著述宏富與梅邨芝麓相伯仲
清初板銷於禁網書亡於繳燬此記鴻篇鉅製
前志闕如殆以此歟然記中虜寇交訌在泮獻
馘明指長白前此秉筆自不能無所顧忌滄桑
幾度板本重新暇日閱此如獲球璧因亟采入
以補遺闕豈唯考古之資亦藝林之快事也

鮑氏兄弟友愛記

陳之東邑人問源

丙辰春余主講鴉峯適鮑翁叔知先生亦以事來城筵讌之間時相晤叙一日先生顧予而言曰予生平諸事愧不如人惟與兄弟輩自束髮以至白首無一閑言意此區區者尙足爲子孫法也茲將修葺家乘子能爲我記數言以示後人乎予聞之不勝愕然曰噫此真先生所以大過人而人莫之及者哉自世道之衰也往往務聲華侈結納蘭盟芝譜聯異姓爲弟昆而手足天顯之親反途人視之甚且等諸讐仇韓子所謂落陷穽不一引手援反下石焉者以予所見

景寧縣續志

卷十六藝文

上

雜記

十六

不知凡幾矣先生由邑城遷居五都東坑地固多佳山而俗尤淳茂先生與昆季等聚處其中怡怡友愛數十年如一日今俱白髮皤然而覲面間推讓揖遜如新賓友鄉鄰之與居者且謂自少至老未聞鮑門中喧聲達戶外也嗚呼是亦足以風矣他日朝廷輶軒採訪方將蒲輪徵聘作式人倫豈特爲一家之慶而示後嗣已哉用樂爲記之以復於先生未知先生以爲何如也

碑誌

潘孝子墓誌銘

焦千之 丹陽

嘉祐七年七月癸卯栝蒼潘君以疾卒至于九年正月己酉葬于南山之原前期一月子媚進士葉君景山狀其行乞銘又持吾友徐從道之書以先潘氏余未之知也葉君余生平未嘗相接以從道爲信人其所與交必可信則其所狀之行宜無妄余敢不銘君諱惟德字天輔生處山野而孝義著鄉里雖□□士而有士君子之行少時母疾革嘗割股割股非古也可以知其孝矣旣喪母跌足蔬食以盡其哀嘗值凶

歲穀價湧起家素豐獨損其直如平時衆富豪因不復增鄉人於是賴其所濟皇祐中歲大歉君之里尤甚廼出穀貸其鄉里而爲券約曰歲稔則見還後還者無幾然君亦不復問它邑民有嘗以事訟君例求貸君亦與之或曰此嘗構訟者君曰彼忍恥見投其窮已甚匿怨不與是亦小人也鄉人稱其長者君性疎財好施樂延儒士以訓諸子故諸子皆篤學有一女子所甚愛特求寒士以妻之則其葉君是也觀其所爲其人可知矣曾祖諱希世爲錢唐人祖諱人達始來處之青田以沐鶴溪山水奇秀因家焉父諱忽

自祖至君凡三世爲處人君初娶龔氏後娶朱氏生子六人長曰振次曰抃次曰拯次曰抗次曰揆次曰援振拯皆早卒銘曰

人誰不亡爲善則臧茲焉以藏旣安且光

福建興化府知府致仕進階亞中大夫鶴溪潘

先生墓碑銘

大學士 李東陽 長沙賓之

鶴溪先生潘公諱琴字舜絃年二十四舉鄉貢在太
學者十年三十四登進士第歷南京吏部稽勳主事
改兵部武庫遷職方員外郎郎中擢福建興化知府
致仕以詔例進階亞中大夫凡在官二十九年家居
三十八年九十而終潘氏譜傳爲唐望族有諱忽者
自餘杭徙青田今分景甯縣所居地名沐鶴溪越若
干世矣曾祖諱堃祖諱鉞考諱沆號善齋處士以家
教聞封南京吏部主事母王氏有淑德封安人公年

景甯縣續志

卷十六藝文

上

碑誌

九

生永樂甲辰六月二十八日幼警敏蚤邃經學尤博
極史籍爲文章典則有古風致性嚴重不苟合其舉
鄉貢者在正統丁卯舉進士在天順丁丑官南曹在
辛巳以後至成化辛卯乃有興化之命建社學毀淫
祠禁端陽競渡元宵放燈舊俗每以片言折獄庭無
留案籍廢寺田以贍公用鉅細出納皆有籍記可覆
按蓋我外舅蒙泉岳公先守是郡執法行政積怨成
謗竟致其官以去繼者方以簡靜獲譽公實再繼益
大爲施設不避權貴人始譁而終信自己亥致仕以
來口不道世事足不至公堂惟教子姓及鄉後進文

學齒德隱然爲東南

隆或引字

重雖踰耄耄神采精健不

異少壯時所著有竹軒集七卷詠史詩一卷忽夢人
贈以詩曰吾將還造化矣會小疾卽移正寢戒婦女
無敢近及晡而逝則正德癸酉歲除日也公羣行悉
備尤敦孝友創祠宇修宗譜闢祭田修累世祖墓自
爲贊記族子翰林編修時用今稱南屏先生者公實
手教竟以學行被薦大口于時公嘗作壽藏於苞鳳
山遷先配陳安人繼室李安人同葬而虛右以俟公
之孫淮府典膳播及按以卒之明年甲戌九月壬午
日窆焉昔公嘗致書屬余銘其先封君及其子國子
景寧縣續志

卷十六藝文

上

碑誌

三

生實之墓余締姻南屏書問不絕公壽自七十每十
歲余皆賦詩寄賀而後詩不及見矣比播叙公年譜
南屏著行狀謂非余莫可爲公銘其疑余已老病舊
學荒落不能模寫感德謹述其族里事行而重之銘
銘曰

彼言之嚶嚶而行滔滔求古於今我心實勞不鈞距
以爲能不門戶以爲標旣寤世夢亦鮮天嶺如公者
何寥寥也然而隱豹于山鳴鶴于臯道德內腴文章
外彪我欲辭名而名莫我逃擬今于古將不爲知止
之疏乘化之陶乎

明故中順大夫太常寺少卿南屏潘君墓誌銘

大學士

楊廷和新都介夫

太常少卿潘君南屏以正德己卯十二月十九日卒
訃聞命禮部諭祭于其私第工部治葬事聞者相與
語曰此京朝官三品以上恩數君以四品未滿考得
之蓋朝廷優禮儒臣盛德事也其子厚奉恩命泣以
告于樞前又屬太僕少卿崔世興具事狀請予銘狀
之言信而理予又與君交久且厚不得辭君諱辰字
時用南屏別號也本杭之漾沙坑人五季時避亂徙
處州青田後分爲景甯自徙處至君凡十七世高祖

景甯縣續志

卷十六藝文上

碑誌

三

諱炎仕元爲浙江行省參知政事署中軍都督府事
曾祖諱褒洪武初授觀察使善詩有集行於世祖諱
宗純父諱流清舉鄉試入太學嘗著聖駕臨雍賦爲
祭酒李忠文公所重與商文毅岳蒙泉二公爲同志
學者稱爲竹坡先生以君貴贈翰林院編修母劉氏
贈孺人君生七月失父三歲失母育於外祖母楊氏
幼岐嶷作止不凡稍長從父車駕郎中鶴溪先生親
教子讀書一目五行下輒成誦下筆爲文遠出諸生
上凡四試于鄉每以疾弗克終事庚子初試文已屬
草同號生突來觀之曳其卷中斷君不欲白于官因

以乞之而出自是不復應試弘治癸丑唐府尹珣王給事綸夏給事昂交薦其學行於朝授翰林院待詔丙辰內閣諸公薦典秘書撰次誥草壬戌陞典籍尋進五經博士正德己巳南京國子缺祭酒吏部以藁城石學士及君薦上以石爲祭酒而擢君編修且九載具疏乞休內閣諸公上其年勞特陞太常少卿非常調也累疏辭免優詔慰諭再踰年疏又三上堅卧不起始得致其事我祖宗朝立賢無方洪武永樂中卿佐巨僚多自布衣薦起如楊文貞公其尤顯者近世惟吳康齋及君二人康齋受職未久卽歸君在官

景甯縣續志

卷六藝文上

碑誌

三

二十七年嘗纂修孝宗實錄大明會典精覈明信不愧良史至于應制述作校勘圖籍廷試執事皆得與焉白金綵幣麒麟緋衣之賜時時有之恩禮殊異比於九卿而君奉職謹畏晨入暮歸未始少懈以地切禁近雖隆冬亦未附火自轉典籍皆未嘗就吏部考課議者以爲不失難進之風爲詩文平正典雅家藏手稿毋慮數千百篇誥草稱是敷揚官守叙述履歷各盡其情得之者往往自慶其所遇與少師文正李公祭酒文肅謝公相知最深其他交遊若山海蕭僉事文明上谷李御史士常南海陳徵君公甫輩皆一

時聞人車馬過從駢闐委巷通宵聯榻或至忘歸學士大夫識與不識皆稱爲南屏先生蘇州有估客至京奉贄求見曰某不知學但聞先生名願一見歸語鄉人耳君未冠卽以經學教授抗顏師席不少假借規度凜然退而私覲則詞氣從容如家人父子故人皆愛敬之教人必先德行凡及門者多登科取顯仕未仕者亦不失爲善士性狷介甘清苦或有饋遺義不可却必稱物答之涉於公事雖一介不取賑窮恤患惟力是盡買地給楸以葬者三十餘人里界相望俾其後便於祭事多不令人知或有問之亦推讓不

自居也未仕時雖不出門庭而朝廷閭巷官府市井人情世故無不周知臨事慎重審而後言爲人謀必盡底裏或屈於勢而奪於力者亦必曲爲之處其篤於信義又如此配趙氏蒙泉公中表女蒙泉爲選婿得君貞靖慈慧有孟德耀之風李文正志其葬備載之子男一卽厚國子生女二長適忠義後衛指揮僉事徐濟次適國子生李兆先孫男一餘慶孫女三君生於正統丙寅正月七日春秋七十有四以卒之某年某月某日葬某之原銘曰

科舉業興徵辟則鮮豈其無賢用之未顯君初自試

亦以舉業再三不售乃韜其燁尙賢之代豈容有遺
薦疏朝上夕召起之優遊禁近二十餘年職司文字
不懈益虔西涯文名今歐陽子人曰南屏聖俞是似
既老而休視履其旋猶有遺恩賁於墓前

上墓志數篇鶴溪南屏諸先正平生大略具此
而西涯李公以蓋代文華新都楊公亦一時宏
達摘詞貞石非唯山川之光其人亦殊足鄭重
前志未采頗爲闕失因補錄之

辭賦

石門洞觀瀑布賦

以題爲韻

吳德修 邑人

遠岫送青崇巔流碧壁立千尋泉飛百尺白雲深處
天開翠嶂空中洞闢步步引人入勝捫葛攀藤行行
少住爲佳漱流枕石則有青田勝蹟古洞仙源兩峯
對峙一水長奔康樂來游築館文成棲隱窮原舊日
之書堂宛在當年之字蹟猶存絕壑螺堆天際儼開
鼇岫斷崖泉落雲端宛闢龍門於焉步履懷開攀巖
目送酷肖廬山還同雲夢昂頭怪石形蟠入耳靈泉
聲弄蒼漪四時之雨清洗蒼崖碧搖一壑之烟薄迷

景甯縣續志

卷六藝文

上

辭賦

三五

碧洞爾乃劃開嶂色界破雲巒素垂細練白湧輕瀾
奮松濤之清籟瀉巫峽之驚湍謝客堂前噴雪渾疑
珠落軒轅邱頂飛泉漫訝雲攢允擅古今之勝境洵
推宇宙之奇觀石磴橫空石泉奔谷洞口臨溪洞前
築屋境堪擬以桃源名可追夫白鹿巖瀉水以拖紋
水懸巖而累縠看到山排兩扇蒼翠盈門觀來練挂
半空玲瓏飛瀑瀑形輕翻瀑聲遠度若烟非烟似霧
非霧高疑銀漢飄來冷訝玉虹奔赴豈是工經織女
一幅長懸無異製自天孫千秋永護幾度風臨似翦
依稀裁石室之羅有時雨過如絲彷彿洗巖腰之布

是則疊石多情入門有路門外雲橫石邊濤怒瞻勝地之當前憶古人而如遇朱文公持節至此嘗懷汶上而興思王副使按部游斯更建詩堂而選句能不登石門之高頂撫景吟詩觀瀑布之清流感懷作賦也哉

石印賦

以桂山之巔有石如印爲韻

葉篤勳

邑人

縣治之巔林巒之際有石印焉似斗端方如屏峭厲天然圭角可嘗斲自神工雲與綰緘毋乃錫從上帝取攜曾有何人摩撫不知幾世命職在龍紀鳥司而外爵可封松鍾祥於鴉峰鶴渚之間山原名桂原夫印也者或鑄金纍若或刻玉爛斑或銀章異製或墨綬同頒要皆捧從殿陛佩向朝班鐫刻須資夫匠手移封必稟於宸顏從未有在巘在岡獨擅鈞鎔於大造不雕不斲忽驚攻錯於他山若夫山之有石也粼粼落落怪怪奇奇爲反爲側或斜或欹花間點綴林

景寧縣續志

卷十 藝文

上

辭賦

三

下參差然而九華壺中祇供文人之雅賞萬石亭下徒誇遷客之瓊辭顧安得品齊模範器重鼎彝名稱儼錫於九重臣欽咸若位置獨高於一邑人皆仰之而不謂靈鍾於地秀啟自天一方宛若四角端然綬綰薜蘿說法則儼徵頭點篆封苔蘚摩空而恍欲腰懸推來一品榮膺夫孰望風而拜下矗處三霄高拱允宜捧日以凌巔則見縣署啟其前巒宮環其右旣蒸化日於琴堂復映文星於奎斗巒曾稱敕方看萬笏森羅橋亦名官且喜雙流環綬鎔鑄謝鐵巖之嶂刻劃分明安排借卓筆之峰圖書富有時或及第花

紅科名草碧翦圭之桐葉遙聯列序之槐陰遍積撥
印泥於霞綺色極丹紅倒印月於溪光體原清白若
神禹印封于岳龜實負泥比梁相印墮自天鵲偏化
石至若石梯表勝石笠凌虛石牌迤邐石柱崎嶇莫
不歸茲統轄隸此簿書十八公管領有松頭銜丕顯
千戶侯關防問竹掌握匪疏方諸十丈石蓮尊崇孰
若例以千尋石筍貴重奚如迄今天末高標峰頭靜
鎮八景爭奇七都同覲底須玉蘊早徵人瑞輝煌不
假金相已極天章朗潤憶當日張公鑄墨固曾字字
有稜昭來茲才子摩挲有不心心相印也哉

景寧縣續志卷之十六

景寧縣縣長浦江吳呂熙纂修

藝文志下

詩

五言古風

題柳伯憩選拔深山讀書小照

嚴用光

邑人月舫

熊丸先澤著名振河東族君起紹家學鯉庭博式穀
弱冠弄柔翰天資本清淑尋登拔萃科有志着鞭速
走馬上長安襟期殊碌碌書懶公卿投交羞勢利逐
翩然返故鄉巖棲傍林麓茅屋兩三間左右蔭修竹

景寧縣續志

卷之十六藝文

下

五古

一

庭際瞰喬林簷前挂飛瀑小橋橫約略清流競洄洑
春鉏三鷺鷥時向波中宿呼童汲石泉茗香煮初熟
一甌浮輕乳籍以消塵黷蒲編手自携古拓紛卷軸
君貌自清癯君神何淵穆軒冕棄不屑章逢遂初服
鷄黍逮親存楹書課兒讀名山石室藏地擬娜嬛福
寫圖日展玩素志愜幽獨悠然太古心長嘯倚空谷
始出縣六首

知縣

袁

銜

泰州淡生

外卸

千瀑滙爲坑千坑流入溪一溪入永嘉赴海不復西
小市日趁虛負載多羣黎黑棕裹椒筍青箬包鹽齋

甌船張風帆來去如鳧鷖飛泉穿石流青山與雲齊
雖無留子嗟種麻尙滿畦我昔此之官春暮倉庚啼
日月曾幾何新秋雨淒淒回首望荒城隱約聞鳴鷄
山店有賢主湯餅相招攜我亦有田園言歸扶耕犁

大常

十里大常坂艱哉此歧路仄徑僅盈尺曲與危巖互
左轉拒傾崖右折礙欹樹崩沙瀆泉水沮洳那容步
輿夫苦延緣側進展蛇蚶窺溪心欲碎觸石足垂仆
攀枝作猱升蹈空輒狼顧秋暑猶爍金揮汗溼衣袴
陟阻艱僕痛行役古所賦惜無叱馭才終有垂堂懼

景寧縣續志

卷之六 藝文

下

五古

二

永懷凜冰淵出險常瞿瞿

官渡

溪峻苦湍急峰高類孱頑茲村冠一邑奇秀超人寰
水旋碧玉鏡山轉青螺鬟山水互輝映好鳥鳴喧喧
佳樹疊松檜芳草羅蘅蒿野飲就村店喚渡臨前灣
空翠挹衣袂涼風解襟顏雨霽樹猶滋雲合峰成環
昔徂富春渚扣絃漁渚間清景倏再過薄宦天非慳
何須嗟藿食樂此須臾閒

金鐘

出險得夷坦緣溪開大麓居民近百家魚鱗列瓦屋

竹樹甚繁衍樓閣頗連屬黃黍苗始抽胡麻穗未熟
茲邨昔家溫爾乃食無粥買斧入采山餘事及種陸
危徑過懸崖包山遙在目尋仇逞雀角攝治輒狙伏
民貧慚撫字俗囂愧食祿夕陽下前峰金碧耀巖谷
暮途聞溪聲滴瀝鳴琴筑

綠草

犄角對金鐘厥名曰綠草山容倍鬱盤水勢相環抱
風帆遙出沒翠竹立如葆民居太星散屋角掛梨棗
當門樹苞栩蕭蕭集飛鵠林端見佛刹參差露簷橈
不聞清鐘聲溪流鳴浩浩鷓巖色丹碧高欲摩蒼昊
景甯縣續志 卷六藝文 下 五古 三
旌旗駭荒邨窺伺雜翁媪野花頗駢娟衣巾映綦縞
是時秋正初皇天成萬寶芄芄膏陰雨山田垂早稻
富歲宜多賴吾欲告父老

渤海

枕溪東赴甌有集名渤海合邨僅一姓聚族逾百載
我來路崎嶇解裝時巳亥風遙火明滅水黑船欵乃
婦孺滿牆頭燃炬窺邑宰前朝通百貨魚鹽稱爽塏
商市今巳蕪里門猶未改豈惟無雞豚至乃闕醢醢
樓閣昔雕繪剝落失光彩牛羊瘠莫收司牧詎無罪
夜深聊就枕飛瀑聲磊磊明發山更高豫憂僕夫殆

昔讀山谷老人太和山中賦鹽五古每首愛不
忍釋以爲合少陵次山爲一手今來宰山縣偶
得六首頗復與之上下敢自許也自記

游鶴溪用韋蘇州韻

袁銜

冷署少歡悰出郭偕佳客清溪水亂流蹇裳踏盤石
秋林紅葉多返照淡將夕山徑寂無人滿地麕麕迹

七言古風

浮邱伯釣臺歌

王維球

麗水竹坪

豸山山之麓巨石累如臺面削平坦邊不側上有一
人把釣臨溪隈羽衣芒屨箕踞坐鯨鯢拔浪掀風來

景寧縣續志

卷六藝文

下 七古

四

聞是道者浮邱伯還丹曾脫塵凡胎回身拍手謝儔
侶一聲長嘯滄波開蓬瀛弱水三萬里乘興亦向溪
灣迴偶拂臺石重理釣鷗浮鷺宿無驚猜釣罷還騎
赤鯉去遂令此臺靈氣萬古相依俚我今訪勝登層
嵬攀蘿披棘剔蘚苔欲投長竿巨浪堆神鰲吼立風
喧虺身無仙骨猶徘徊搔首盼望仙雲頽但覺水聲
激激清月出嶺風花催

石印歌和吳少亭司訓

嚴用光

鶴渚羣山高峨峨桂山橫亘俯清波有石一拳方而
古天然卓立山之坡石印名字耳久熟挈伴登山欣

寓目好古緬懷合尹賢篆刻模糊難卒讀

邑合張公
琢刻石印

二字并詩苔痕斑駁蘚紋蒼坐鎮名山閱星霜品題一經

價十倍居然頑石亦生光我撫此石三歎息不生名

邦降僻域雲蒸霞蔚年復年管領洞天誰賞識倘或

搜奇索異逢米顛呼兄肅拜定流連不然封侯拜相

尋常事置身合在玉堂前石聞我言羈然起君請靜

聽談妙理榮華轉瞬如浮雲累累若若何足恃君不

聞山頭石甕本天成家家春釀滿越城騷客游人到

今說維石能標萬古名又不聞異人崛起在浙右鐵

券金書今何有長留石鏡照人間直與天地同悠久

景寧縣續志

卷之藝文

下 七古

五

可知人傑地效靈石兮石兮垂芳馨天荒地老印長

生細視篆鏤擬模型

惠明寺茶歌

嚴用光

敕木峰高插蒼旻南泉列岫排嶙峋古柏老松何足

數山中茶樹殊超倫神僧種子忘年代靈根妙蘊先

天春棲真庵接惠明寺脂柯肉葉無纖塵滋雲蓄霧

灌泉液嫩芽初茁含清真寒食清明都過了采焙穀

雨趁芳辰雀舌龍團分次第紙封瓶貯標題新寺裡

老僧偏解事新茗餉我笑言親呼僮官井汲泉煮石

乳清冷浮圓勻旗槍一一相排列滿甌色味良精醅

我聞當年陸羽著茶經苦薺香茗多良因四十三品
別高下千秋俎豆祀茶神洛陽盧仝最相識飲過七
椀無逡巡二公不到南泉地坐合異卉嗟沉淪又聞
武彝羅芥多佳品年年納貢舊章循入京馬上爭矜
貴黃封紅裹呈楓宸漸江自昔產佳茗天台天目若
比鄰龍井雁湖俱清絕往往茶事談紛綸此山僻在
東南奧抱奇孕美無由伸仙人株生靈異石欲傳韻
事難其人我作此歌示山衲辭冗語拙空鋪陳茶兮
茶兮莫嫌知己少靈芽秀液今沾唇會須品題到仙
客玉堂清宴娛嘉賓我且與茶堅久約名山空谷長
景甯縣續志 卷六藝文 下 七古 六
此藏奇珍

題端木叔總

百祿太鶴
舍人之子

同年石門山房遺集

嚴用光

風詩首列三百篇累朝著作紛推遷謫仙已去少陵
沒流風歇絕幾千年枯蒼僻處東南奧青田詩學猶
相延文成公是人中傑詞章勳業同敷宣天生名世
無與匹郁離篇什開其先香巖太守才華擅摘葩揆
藻騁清妍太鶴山人文章富千言下筆興飛騫混元
山色石門瀑題詩往往爲流連少鶴天機亦靜妙善
承家學追前賢定香亭上續前賦

阮文達撫浙築定
香亭發題課士拔

舍人爲
首選 揮毫潑墨裁雲箋超宗鳳毛洵有自哲匠品

題非偶然驥子一朝逢伯樂駸駸欲渡驂騮前尋撥

巍科膺選拔金門待詔近瞻天憶昔京華同聚首少

年才調何翩翩尊酒論文交誼洽臨歧贈句離懷牽

屈指同岑滿都會感君知己情纏綿別來歲月堂堂

去棘闈邂逅秋月圓世界滄桑一彈指人生聚散如

雲烟婿鄉豈戀峴山樂移居且欲歸南田新詩一卷

忽遺我璀璨滿眼珠璣聯妙緒靈機洗塵俗清詞麗

句鬪芳鮮聯吟況復得佳偶玉臺唱和真良緣我思

和韻寄同志其奈腹笥非便便修文忽傳天上詔騎

景寧縣續志 卷之藝文 下 七古 七

鯨趁赴蓬萊邊檢讀遺編深太息故人不見淚如泉

伯牙琴爲子期碎微之集付香山傳古人生死交情

見此風已邈心懸懸傳經喜復有令子顯明德之後

理非愆試看乾乙峰前守易冢千秋有鶴長高眠

於栝蒼文獻原原本本是極有關係文字集中

傑構也

桃花洞行 王錫藩邑人

桃源自昔稱避秦漁郎一去難問津神仙窟宅久不

到羲皇乃見山陬民栝山道接五雲境洞天獨闢馮

公嶺花開花落自年年天桃占斷三春景樹杪蒼翠

迷烟嵐鎖鑰遙控山北南桃洞直若柳營固寇警往
復頻相戡函谷古封丸泥一劔閣嵯峨此與匹盤空
磴道凌雲霄幾向仙寰結桃實洞間要隘逾金湯花
時閱劫嗟紅羊臨風千燾氣森肅扼塞長此蒼山蒼
桃花流水別天地入山須抱出山志種花潘岳宰河
陽聞道山城有仙吏

南明山石梁歌

王錫藩

山靈何代關區宇獨有石梁疑鬼斧此峯恍惚飛從
西竺來勝蹟留貽自今古層崖琢削捫苔青梁間踏
險探奇憑五丁華嚴佛境現彈指流觴灑雪雙名亭

景寧縣續志

卷六藝文

下

七古

八

峭壁嵌空作巖窟就中乃復工位置歷萬千劫堅不
磨雕鏤彌盛歎題字石棱棱以相逼梁屹屹而半懸
摩挲碑蹟白日青天深林滴翠年復年幽巖時獻奇
花妍三梁昔擅廬山勝憑眺遐將曲闌凭石橋又復
傳天台飛仙結伴嘗徘徊仄徑相爲深茲山亦其偶
炎天紛見蝙蝠飛古洞奧覺蛟龍吼梁兮梁兮已千
秋迎風鐵幹相蟠虬將軍故我此大樹下視城中萬
家烟火皆齊州仙區窟宅久無恙晨昏幻出雨晴狀
池開印月光入微此梁突兀果天上稚川仙去丹九
成巖畔流泉如有聲山門指點石橫處往來游跡誇

南明嗚呼南明石梁半山半誰跨仙橋倬天漢

清修寺古柏

葉篤勳

邑人
邦輔

清修寺外翠雲流清修寺內綠陰稠重疊層堆揮不去
礫礪老柏幾經秋憶昔孔明廟前植扶持曾說神明力
螻蟻能識天地心鸞鳳相栖參黛色于時盤錯向沙門
法雨遙沾淨六根百尺虬枝空色相大千世界渾乾坤
豈真材大難爲用自是材大人珍重勿翦勿伐記風詩
芟憩應與召棠共

鶴溪釣臺

葉篤勳

我聞尙父起磻溪鷹揚盛績無能齊又聞嚴陵老富

景寧縣續志

卷六藝文

下

七古

九

春羊裘介節迥絕倫一行一藏各異轍伊誰把釣詳
分說惟有持竿沐鶴之浮邱道骨仙心任去留既異
功名士亦非隱逸流獨抱天真天上去孤踪倏忽杳
難晤雲散風流幾千年留得蒼涼片石長此籠烟樹
樹前不見鶴飛影樹裡不聞鶴鳴音世界微茫類如
此底事詩人說到今于今崖間鐫字赤選勝頻來謝
公屐渭水桐江曾似無天風吹醒游仙客

冬筍

袁銜

京師冬筍初登筵貓頭幾彎酬盈千燈紅酒綠供醉
飽縷金切玉嗟芳鮮豈知閩越千山外三錢一束人

爭賣地爐煨火伴甘藷和以鹽薺菜世間貴賤
真兒戲轉緣迴黃任人意割肉曾驅燕市車飯蔬忽
作窮山吏苦竹幽篁山鬼鄰齋厨葵藿笑官貧祇餘
多筍無昏旦寄傲長安舊酒人

鶴溪懷古

嚴思正

邑人
琴軒

把釣浣紗俱陳迹一帶溪光依舊碧溪旁花鳥爲誰
忙過眼棖觸詩人筆鶴溪自昔屬芝田浮邱遁跡是
何年維石成臺勢突兀天然矗立水之邊垂綸持竿
釣烟水百代茫茫疇可比飛昇事宜涉荒誕沐鶴仙
人呼不起浣紗石上問前因謝公嘲女此溪濱娉婷

景甯縣續志

卷十六藝文

下 七古

十

仙子今何在酬答留詩字字新招鶴來歸潘太守浩
歌俊逸詞三首思解纓絡追仙風節概凜然真罕有
滄桑換劫感淒涼賸水殘山付夕陽訪古更向芳洲
過溪流嗚咽起愁腸往事轉曠何足數鶴去潭空餘
沙土梅花慘淡松花青惟有高風足千古

表孝錄題詞

爲沈孝女作

潘文藻

邑人
西山

稽山鑑水多遺跡耆儒況在談經席扶植綱常作人
師春風化雨宏其澤膝前有女綺羅身女訓女誠常
書紳巾幘大有鬢眉氣長成甫度十二春遠道作官
攜嬌女女樂追隨無他語何期旬日父病危心欲代

父將身許怡然畢命赴重泉豈爲沽名棄俗緣精誠
但冀延父壽視死如歸果格天我讀女傳心悲惻多
少男兒學不得半由家教半天資至行純誠具定識
絳霄丹旆遠來迎定作神仙上玉京莫云幻渺虛無
據慧業眞靈早列名

上前甌海道道尹黃公涵之時公方爲萊子舞

知事

喻榮華

奉天福忱

漢家循吏數龔黃潁川渤海遺澤長當年治平稱第
一箕裘後葉疇能方黃公世裔綿歇浦篤生哲人繩
祖武爲政公平寬復寬熙熙但覺如春煦秉節來尹

景甯縣續志

卷之藝文

下 七古

十一

甌海濱十六縣內頌聲頻君侯善政不勝紀

公到任辦育嬰

設醫院施藥賑饑倡修道路善舉甚多

請說侯家樂天倫君侯堂上有

白髮長眉青青神仙骨福花壽草共敷榮要爲羣生

作蔭樾膝前令子似廬陵勛猷事業日蒸蒸日上

嶺蒙恩惠蒼生自若春臺登人道君侯是生佛須知

生佛所自出江漢之化起宮闈侯爲元元分愛日卽

今板輿御四明會稽山上慈雲平瑤池此日開筵宴

君侯親前奉酒觥六郡人民同祝壽歡呼鼓舞老僭

幼祝侯功名鐘鼎垂祝母年齡松柏茂侯位愈高恩

愈浩母壽愈增民愈好菊花晚節自鮮妍芬芳含笑

迎萱草昨宵寶婺正輝煌兩浙東西一樣光雅山高
處伸遙祝願率羣黎晉一觴

題鯉躍圖

吳鍾鎬邑人子京

破浪騰空鼓鬣出海上鰲山見萃律大魚一躍小魚
隨羣鱗潛伏驚相失天風蕩蕩濤不平泣珠震動鮫
人室始信凌霄定有期雙鬚高捧一輪日

五言律詩

孟公樓

嚴用光

康樂題詩處千秋仰孟樓山城資映帶文物見風流
曠代猶相感斯人不可儔客懷無限思江水共悠悠

景甯縣續志

卷七藝文

下

五律

七

題江心小景圖

嚴用光

地紀中川勝披圖繫我思壯觀雙寶塔正氣兩叢祠
孤嶼潮平早扁舟客到遲甌江行問渡訪古更題詩

外卸

嚴用光

水陸交衝地征夫渡口催孤帆隨鳥至小市傍溪開
路指青山外舟停綠浪隈家鄉知未遠客思漫低回

五都道中

七首

袁銜

崔嵬日登陟總是主恩深祇惜窮荒吏難爲將母心
嶺雲愁裡望淮水夢中尋霜雪欺游子初來鬢上侵
空濛不辨路頰首看雲生百折羊腸斗千峯鳥道傾

僕夫嗟足繭故宦屢魂驚况復瀟瀟雨竹鷄岡外鳴
穹陰疑釀雪瀾漫四山雲泉響天垂暮林寒路不分
溪流遙入越山勢遠連閩誰寫炎荒險淮南舊有文
託宿窮山裡垣欹屋復斜亂鴉爭噪客老犢暮還家
山色當門黑溪聲竟夜譁歲寒心不憚薄宦走天涯
一瀑從天落空山萬古音峰巒張鳥翼雷雨助龍吟
卷石似成底沈竿莫測深何當秋月滿終夜此鳴琴
屋向懸崖架溪從樹杪飛攜筐收芋去荷蓀種杉歸
尙婦餘銀鬢山民尙葛衣野梅開澗曲清瘦不能肥
回首長安路良朋眼最青月殘趨太液雪滿醉旗亭
景寧縣續志

卷之六藝文

下 五律

十三

有夢爭王室無才廁漢廷空山今獨宿猿哭不敢聽

步豸山

袁 銜

出郭卽登陟大山宮小山偶隨白雲去更與斜陽還
鳥雀疏林滿牛羊野色閒清溪如有意向暮水潺潺
景邑無菊博泉守戎家有一本賦贈

袁 銜

僻縣無秋色君家見一枝但教人載酒應有客題詩
天地清霜日溪山苦雨時寒香珍晚節莫嘆鬢如絲

半載

袁 銜

半載窮山吏看山暮復晨何才堪報國有夢只思親

民好無情訟官成徹骨貧歲寒知不遠聊與伴松筠

感秋

袁銜

金風吹萬籟如助客悲秋紅葉况搖落候蟲還唧啾
全家供海曲薄宦獨東甌不送將歸者登臨恐白頭

送柳生

景元回沙灣

袁銜

荒城無客到明日爾偏歸溪水清逾急秋山綠不肥
危途猿正嘯小市鳥應飛相送知何處蒼蒼望翠微
二載蠻中路惟生可與言斜陽時杖策落日每開樽
滄海前期大青山舊約存莫將翦燭話輕與俗人論

七言律詩

景甯縣續志

卷十六藝文

下 五律

古

紀鮑孝婦劉孺人割股事

光憲先生妻

陳之清

邑人澄川

孝道從來事近愚况由巾幗異凡夫但知姑病求方
藥那計身完愛髮膚割臂不辭腕力弱調羹真覺血
痕枯至誠畢竟天心格依舊堂前一杖扶

高演任祠公燕

知事

吳裕中

福建建陽

濟濟英才序一堂欣看桃李總成行

時任族來會者明經二廩膳生

九附生三
十餘人

漫言耕鑿人情古尤見詩書世澤長俎豆

適當輪奐美簪裾如帶藻芹香到來莫道催科俗樽

酒論文快舉觴

壬戌春日避亂際川將假居潘君南浦之屋先

以詩爲券兼呈月湖先生和政

教諭

汪曾本 錢塘子養

花封家世重河陽累葉清芬祖澤長四面溪山環畫
本一門羣從盡書香最難避亂逢賢主渾忘棲遲在
異鄉我是前身春社燕仍依王謝舊華堂

東甌西郊山外偶成

梅冬魁 邑人夢雲

十載東甌一宦纏雪泥鴻爪記前緣老松欲化千年
石叢桂新開八月天自歎年徒增馬齒可憐名未勒
燕然中川不是忘歸地多買青山待俸錢

此首見潘嶧琴閣學兩浙輶軒錄

景寧縣續志

卷之六藝文

下 七律

五

贈潘澄鑑仁丈

褚成績 餘杭

山斗文章夙世欽天教翰墨起園林一條冰署頭銜
好八秩萱堂愛日深潭水桃花賢主誼天涯芳草旅
人心雅峯點點斜陽暮好句應須策杖尋
避寇人從閒道來又謀棲止到山隈鴻噉中澤君堪
託鯉對一庭我幸陪登仲宣樓游客感讀安仁賦笑
顏開但教風鶴無傳息長咏新詩酌綠醅

自責

葉凌霏 邑人璧渠

吾道終窮不必悲感懷萬事覺迷離妖祥自古興亡
定禍福於今善惡移報國情疏無路達齊家意懈有

人知寒宵漏永憂端結天下滔滔敢自私

咏史 漢武帝

葉凌霏

雄才大略想中興只靳淮陽碩輔登汾水秋風團扇
憾輪臺暮景覆車懲託孤正士猶分曉信術邪心孰
順承可惜施仁多慾語格君豈止諍臣稱

過時思寺

嚴用光

層崖遠上最高山十里平疇碧幾灣隱隱寺藏紅樹
裡沉沉鐘出白雲間青纏墻壁藤蘿古翠映峰門松
柏閒翹見時思題額在文成遺墨快瞻攀

寺門時思道場四字

劉文成
筆也

景寧縣續志

卷十六藝文 下 七律

六

北上渡揚子江

嚴用光

大江東去日悠悠揚子津頭又放舟山擁金焦團兩
點地分南北劃中流波心魚鯉隨龍化天際帆檣若
薺浮漫說乘風思破浪倚橈長嘯海門秋

黃河

嚴用光

萬里黃河終古流茫茫濁浪拍天浮崑崙一派氣逾
壯神禹八年功竟收日月轉圜歸浩浩乾坤鼓盪逝
悠悠尋源有路探星宿擬趁靈槎泛碧秋

登豸山歸遊金仙寺和嚴月舫明經韻

訓導

吳道林 桐廬少亭

不須花裡聽鳴鈺挈伴登山趁晚晴人語近從雲際
出日光遙向水邊明老松當戶忘年代古佛低頭笑
世情卻好官閒無箇事夢中還在上方行

思親

洪乃漣邑人
達源

江湖浪跡一官寒膝下人離夢未安千里自慚疏問
寢寸心惟有祝加餐客因久別言愁慣語到無題下
筆難寂寞書齋明月夜思親倚遍曲欄干

和柳伯憩同年招游豸山原韻 陳詩

折簡招游豸嶺巔茫鞋沿路踏山烟疏林雨滴初晴
候蕭寺風清近午天醉後強吞三盞酒情多拌擲一

景甯縣續志

卷十六藝文

下 七律

七

囊錢西園雅集誠堪擬覓句追陪信有緣

故人家住石巖巔

君居
沙灣

一望靡蕪繞翠烟回首春明

驪唱日

甲戌同
客都門

相思秋水鴈沈天家風我負遵投轄

緣 雅誼君同寵受錢待到年來燈節裡登堂踐約話前

次韻和伯憩明經游豸山

訓導 張維翰 歸安
慕九

命儔選勝陟高巔雨後雲開捲宿烟携有佳肴來碧
嶂愧無好句問青天莫酬壯志聊酬酒只愛名山不
愛錢他日河東刊大集飛鴻幸附雪泥緣

留別景甯紳士

知縣 葛華 閩縣
植初

無數峯巒插漢高洞天深處遠塵囂桂山石古留方
印莘嶺泉甘勝綠醪比戶儉勤風近樸連年豐稔雨
如膏此間不異桃源境笑學漁郎走一遭
怕聞衆口頌同聲保赤終難副盛名政不煩苛惟省
事獄無大小只平情民知畏法刑常簡官解安貧夢
亦清喜有廉明新合尹定多霖雨福蒼生

屈指交游最繫思况從文字結心知品如裘仲真吾

友月朔學本程朱是我師慕九月旦羣賢欣畢至雲

程萬里輒相期請看佳氣雅峯起會有鸞凰簇羽儀

梅花送我出山阿父老情深惜別多一曲驪歌增悵

景寧縣續志 卷十六藝文下 七律 六

惘兩年鴻爪感蹉跎乾坤莽莽身奚託風雪勞勞鬢
已皤傳謝故人揮手去未知此去復如何

留別景寧賓紳愴然有作 教諭 吳穎菴諸暨亮公

宦游適到浣紗濱我本浣紗溪上人諸暨城南爲西子故里慚

負俸錢安固陋自來儒吏重清貧嚴光識面鬚眉古

張翰談心意氣真更得劉郎共晨夕使儂不敢憶吳

萼

雄心猶想上公車七度春官白髮疏交道喜添新縞

紵歸裝欲典舊琴書雅峯便有鴻泥跡鶴水曾留鳩

拙居此日明年京洛望天邊木末渺愁余

鶴溪閒步遂至葉府前

袁 銜

行盡平橋到草堂家家穉榿總登場丹楓霜染初生
色朱橘風來倍送香放鶴亭空猶可指養魚陂在已
全荒秋花徧地芒鞋軟爲訪溪邊黃四娘

游覽葉太君園林

先君忌日部民有餽魚者作詩志之

袁 銜

白水盟心敢自誇愧他贈鯉到山家加籩聊供先人
饌彈鋏能銷薄宦嗟頰尾蒼涼穿柳葉金鱗潑刺帶
苔花好音試問西歸客車偈風飄日欲斜

九日登署樓作

袁 銜

景甯縣續志

卷十六藝文

下 七律

九

薄宦頻添瘴癘憂驚心時序獨登樓黃花九日難娛
客紅樹千山漸作秋回浦早霜遲鴈到枯蒼苦雨聽
猿愁異鄉惆悵逢佳節自采茱萸懶上頭

晨起署樓望雪有作

袁 銜

敕木山高望不分吐雲霏雪正紛紛玲瓏竹葉皆棲
雪重疊松梢半挂雲徑沒更無人過嶺林寒應有雀
呼羣窮荒回首旗亭路唱到黃河酒總醺

雪中看紅梅

袁 銜

紅萼衝寒豔不支也如庾嶺兩三枝官貧那怪梅花
瘦暑冷惟看雪絮肥翠雨久疏南海夢瑤琴爲鼓北

風詩湖心亭上春香好二月重游也未遲

題袁淡生明府詩後

張鳳翔 邑人 梧岡

舊時聞望重袁絲到處留題鴻雪詞千里馳驅成幻
夢一官寥落寄新詩維揚每切別離憾下邑空懷遺

愛思幸得淵源佳子弟猶存手澤憶名師

白雪陽春作手推輪囷盤鬱此奇材張平子有四愁

賦龐士元非百里才造物鍾靈宜大用斯人應運又

先摧茫茫天道誠難識流水高山空低徊

送柳君會貞游學日本

杜師甫 青田 詩圃

奇氣縱橫壓眾英乘風破浪走東瀛時艱應作回天

景甯縣續志

卷十六藝文

下

七律

三

想材大何嘗域地生司馬曾多題柱感終軍不盡棄
襦情卽今聖世需才日待看羣英佐太平

鴉峯捨篆邑紳以詩送別次韻報之

知縣 萬 康 宜興 寄麓

贈別瑤章禮意崇口碑譽望太優隆亂絲多病紛難

理美錦無才製未工野外桑麻沾夜雨陌頭楊柳悵

春風頓教棖觸離懷起唱徹驪歌羌笛中

四面青山繞縣城衙齋鎮日聽鶯聲非關僻壤稱難

治悔奉高堂賦遠征自喜身輕銀綬解敢云心澈玉

壺清翻教辜負攀轅意潭水桃花總繫情

過浮傘渡

知事 許之龍 宜興雲卿

古渡盈盈欲問津相傳浮傘舊仙真清溪屈曲滌村
外奇石崢嶸鎮水濱幾幅蒲帆風勢穩一篙桃浪漲
痕新臨流何必葦杭詠勝蹟于今紀大均

七言絕句

自勵

潘 漪 邑人澄鑑

平生矢志勵前型陋室無嫌德自馨守正齋中深夜
坐殘編長對一燈青

題桂萍楓菊鴻鷗山月秋八景

限雨絲風片烟波畫船八韻

鮑一諤 邑人邁千

景甯縣續志

卷六藝文

下 七絕

三

叢桂留人巖之陽輪囷醜醜一山古秋風撼動最高
枝空林厯落墜香雨

密葉藏魚渾不知西風吹滿小方池一竿引得銀鱗
上點點青圓貼釣絲

曉霜絢染淺深紅再好殘霞夕照中羨煞吳江饒麗
景遙舒碎錦趁秋風

孤芳獨作羣芳殿金英遠見陶公面祇嫌秋色由來
淡點綴東籬貫一片

結陣湘江夕照邊啣蘆飛渡九秋天離情別憾憑誰
寫一幅雲牋萬縷烟

逐浪隨濤自在過朝遊滄海暮江河洞庭月色瀟湘
水無限閒情付碧波

白雲深處樵夫話紅樹梢頭夕陽挂點點寒鴉滿霜
林天然一幅無聲畫

明鏡高懸水接天漁翁醉卧荻蘆邊醒來忽訝通湖
白載得清光滿釣船

富春釣臺

嚴用光

富春山下夕陽斜左右高臺倚斷霞明月一竿灘七
里州名千古屬吾家

自著羊裘謝世譁三公於我復何加投竿不釣名和
景甯縣續志

卷十六藝文

下 七絕

三

利終古客星照水涯

訓子

葉蓉照

操守莫因習俗移執鞭求富任人爲從吾所好行吾
素際遇休論偶與奇
渴飲盜泉似飲醜平生勵志戒貪婪窮居不損貧非
病顏巷簞瓢勝旨甘

四言古詩

民國二十二年孟夏公餘與同人讀六經舊籍

穆然遐思輒有是作

縣長

吳呂熙

揮夫
浦江

用天之道則聖之經先聖有言惟一惟精

精一維何道在至誠誠之所至量莫與京
至誠之道其道平平放乎四海四海永清
至誠之道博愛深仁可以治己亦以治人
惟予小子邈邈稽古穆然遐思美哉舜禹
天祚華夏後聖繼軌三民旨歸亦敷土宇
先聖後聖其揆則一會通古今昭於星日

景甯縣續志

卷十六藝文

下

三

詩餘

鴉峯寒雨聽王位中鼓湖絃有感倚甘州一調

袁銜

漸萬山紅葉落颼颼寒雨滿城頭悵鄉園千里疲民
百戶薄宦東甌怕聽繁絃急索彈指奏涼州惹我十
年事都上心頭太息芳華依舊只采芳遲暮兩鬢
先秋記宜春社曲珠串聽歌喉縱夢裡海棠檀板待
醒來溪水繞牆流無窮憾簪花人老花也應羞

附錄

揮夫縣長修邑乘告成奉贈

承審 傅承根 培之岳陽

不綰軍符作宰官卻從文獻此心殫曾開精舍衡今

古府內組更坐邊樓策治安百里山河資帶礪千秋

事業付毫翰吳公第一真佳話預記循良傳裏看

景寧續書告成贈柳總輯

前人

鶴溪有俊人儒林推老宿髻鬣通經史早具神童目弱
冠渡東瀛奇書蓄盈篋歸來參議席默造兩浙福桑
海百變間隱居寄巖屋佳氣鬱葱蘢沙溪似盤谷足
跡罕市城姓名徹司牧吳侯修掌故以君史法熟禮
聘主編修篇章果卓犖午夜手丹鉛時時披簡牘一

景寧縣續志

卷六藝文

五

十有七卷卷卷珠一斛八九閱月中書成驚且速協
修余滋慚偏勞爾則獨竊以文字緣展卷時三復柳
州本嫡傳扶風乃私淑湖湘二王問時亦沾膏沐每
歎才藝難況在萬山隩輪囷復鬱盤覩此喬林木樗
落窮山中偶爾散其馥讀罷且長吟爲爾常蹙蹙

